



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tiryimym@aolima

yt tir yimym

TAPAK 8

Tia mesura Tsungremi ni kumzük: Trump

Thomas Muller international football asaya nungi anener

VOL. XXI ISSUE NO. 273 (ADOK 273) DIMAPUR SANGTENNÜ (TUESDAY) CHITENI (JULY) 16, 2024 ₹ 5.00

SDG India Index atema shisabulur: NPCC

Dimapur, July 15, 2024 (TYO): Niti Aayog-i Sustainable Development Goals (SDG) India Index 2023-2024 sayaogo aser maneni "worst performing states" nung Nagaland dena lir.

Niti Aayog indang SDG India Index ajanga linük nung state shia Socio-economic aser Environmental criteria asadanger aser taküm-a Nagaland jenjang teküpoktiba nung aliba atema shisabulur ta Nagaland Pradesh Congress Committee (NPCC)-i metetdaksüogo.

Iba osang ajanga Centre sorkari state sorkar dak tamang makaba aser NDPP-BJP state sorkari ochimashi inyaker ta Congress-i teti shia aruba kulisütsür, ta NPCC-i ashi.

SDG India Index sayaba sülen anogo ka lir NDPP President-i General Elections nung parnok candidate takok mangubaji national aser international onüktem ajanga liasü ta ashiba angashia kanga ratar ta Communications Department, NPCC-i sangdong ka nung ashi. NDPP-i Centre sorkar aitsür saka idakji parnok den yariteper BJP-i ang anir ketdangsür. Anungji iba ya nübertem anisatsü atema jembiba dang lir ta parnoki ashi.

Nagaland nung alirtemi jenjang tajung angutsü temsüa lir anungji state sorkar inyakyim melenshitsu kechiyong sorkar teti dangbo nübertem mekulakoktsütetsü ta NPCC-isa ashi.

Ex-MP 200 tema nem 'eviction notice' agütsü

New Delhi, July 15, 2024 (Agencies): Taoba Lok Sabha MP 200 tema dang Lutyens' Delhi nung parnok official bungalows toktsütsü tetuyuba agütsüogo.

Taoba MP tem nem Public Premises (Eviction of Unauthorised Occupants) Act kükubok 'eviction notices' agütsüogo ta Hombarnü Union Housing and Urban Affairs Ministry-i ashi.

Shitakba agibo Lok Sabha anenba sülen ita ka tsungda MP temi parnok official bungalows toktsür aotsüa.

"Tang tashi nung taoba MP 200 tema nem eviction notices agütsüogo. Parnok dang tekaraba nung official bungalows toktsür aotsü shiogo" ta ketdangsür kati ashi.

Parnoki tekaratiba nung official bungalows metoktsüra ketdangsürtem 'forceful eviction' atema yoktsü ta paisa ashi.

Lok Sabha Secretariat ajanga MP tem nem official bungalows agütsür saka Housing and Urban Affairs (HUA) ministry-i Lutyens' Delhi nung Union ministers nem bungalows lemzüksür.

Assam nung VCs shimba atema ashishiteper

Guwahati, July 15, 2024 (Agencies): Assam nung state university balala nung Vice Chancellors (VCs) shimba ateam ashishiteper ken o tulu ka adoka jembir.

Assam nung state universities 19 nungi 6 nung tangalen nungi VCs shima lir aser parnok kar Hindu nung telok Rashtriya Swayamsevak Sangh (RSS) den sendaktepa lir.

Assam Science and Technology University, Sri Aniruddhadev Sports University, Krishna Kanta Handiqui State Open University, Kumar Bhaskar Verma Sanskrit and Ancient Studies University, Bodoland University aser Birangana Sati Sadhani Rajyik Viswavidyalay nung tangalen nungi Vice Chancellors (VCs) shima inyakdaksür.

VC tem ya Uttar Pradesh, Delhi, Rajasthan, Maharashtra, Odisha aser Andhra Pradesh nungi anir aru.

Ano, Assam nung central universities 2-Assam University aser Tezpur University nunga tangalen nungi VCs shima lir.

Assam University nung VC Prof. Rajive Mohan Pant ya Uttar Pradesh nungi aser Tezpur University VC Prof. Sambhu Nath Singh ya Bihar nungi lir.

Assamese nung temsüa aliba shisashirtem toktsür parnok shim ta nisungtemi ola adoker. Iba ajanga university nung VC shimba inyakyim kanga junga asadanga bushiteperdar.

Assam Governor ya state universities nung Chancellor lir aser pai RSS ideology tsütsü ashirtem search-cum-selection committees nung shimoker ta tai tongloksür.

Item committee nung Assam adena orr alirtem aser RSS den tesentaktep alirtem chairman aser züngsem asütsü shima lir ta osang angazüker.

"Iba ya Assam nung sempet aketba shisashirtem mezüngmeshiba lir. Item university ketdangsütsü atema Assamese academics peria dang lir" ta professor kati ashi.

Iba ajanga Assam nung shisaliok rejutem Hindu tangatetba benoktsü meranger ta nisungtemi ola adoker.

Nagaland nung Waterways tenzüksü atema sentong atonger



July 15, 2024 nü Niathu Resort, Chumoükedima nung Union Minister Sarbananda Sonowal-i milen tsükloka Stakeholder Conference lapoktsüba angur.

Dimapur, July 15, 2024 (TYO): Sen kanga meindoki aser tiptema senzüsensongbaji waterways lir ta Union Minister of Ports, Shipping & Waterways Sarbananda Sonowal-i ashi.

Hombarnü Niathu Resort, Chumoükedima nung Stakeholder Conference nung o jembidang "Prime Minister Narendra Modi-i teti linük nung inland waterways atema temulung agütsür kechiyong iba ya transportation asoshi kanga tajung lir" ta Union Minister Sonowal-i ashi.

Prime Minister Modi-i mangdang ayuba ama India renlokba nung Northeast-i tongti shilem agitsüla. Northeast nung waterways ajanga linük yangerba nung shilem agitsü maongka angutsü. Northeast nung

waterways renloktsü atema onoki tenangzükba agia lir" ta pai ashi.

"Northeast lanurtemi Maritime Skill Development Centre nung training agitsüla aser marine sector nung mapa inyaktsü maongkatem agitsüla" ta Sonowal-isa ashi.

"Longmatra (Nagaland) nungi Avangkhu tashi National Waterways 101 ayimer aser iba nung Inland Waterways Authority of India (IWAI) ajanga Inland Water Transport asadangtsü" ta Vice chairman, IWAI Sunil Kumar Singh-ia ashi.

"Nagaland nung alirtem asoshi Ports, Shipping and Waterways ya tasen lir. Asenok anisüngzuka aliba nungi adoktsüla aser iba inyakyim tasenba nung shilem agitsüla. Nübertemi shilem magira

department kijai dangbo kecha meinyaktetsü" ta Nagaland Chief Minister Neiphiu Rio-ia ashi.

State sorkari lanurtem aser sendaktepa alirtem dang tarutsü putu atema iba inyakyim nung shilem agitsü ayongzüksü merangtsü, ta CM Rio-isa ashi.

"Northeast region nung Doyang River dena waterways amshia shishilembatsü lenmang sadema lir. Asenoki rongsenketzung renloktsü atema inyakyim tasentem benshitsu" ta Deputy Chief Minister Y Patton-ia ashi.

"Iba ajanga local business ajangzükba dang masü saka tangalen nungi arua asenok den shishilembatsü. Asenoki transportation network tajung ka adokdaksütsü atema alizüng yudi" ta Patton-isa ayongzük.

Tuli paper mill lapoktsü atema maparen tenzükur



Tuli paper mill nung mapa inyakertem agiba noksa ka angur.

Dimapur, July 15, 2024 (TYO): Nagaland Pulp And Paper Company Ltd alizükertemi Tuli paper mill lapoktsü atema mapa inyaktsü tenzükogo.

3A Capital Services Limited (3ACSL) ajanga Tuli paper mill alizükogo aser tang parnoki mill nung taoba mapa inyakertem nem senotsü agütsüba audit phase agidar ta ketdangsür kati ashi.

Taküm küm tatemlen tashi nung iba mapa tembangtsü imlar aser iba sülen mill tanaben

lapoktsü asoshi mapa tenzüksü ta 3ACSL ketdangsürisa ashi.

Tesüiba nung Nagaland State sorkar shilem 12% liasü saka tang 3.51% dang kümogo. Külen, Mumbai nung amenoka aliba nija company 3ACSL shilem 96.49% lir.

April 2023 nung Nagaland-i Kohima nung G20 business meet ayonga amongdang CM Neiphiu Rio-i "Mokokchung kübok Tuli nung aliba paper mill nung 1991 nungi mapa anenogo aser talinür nem lenmang lapoktsütsü atema

maparen anentsü" ta metetdakja liasü.

Tuli Paper Mill ya Centre sorkar kübok Hindustan Paper Corporation Limited (HPCL) enterprise aser Nagaland state sorkar külemi lapoktsü saka koltem majungba ajanga tamakok angu ta CM Rio-isa ashi.

Iba sülen yaküm November ita 3ACSL-i auction ka nung NPPCL alizük. 3ACSL ya "Non-Government company" ka lir.

3ACSL-i E-auction ka ajanga NPPCL indang Rs 1, 13, 62,231 equity shares alizük aser iba sülen Letter of Intent (LOI) angu.

Nagaland State sorkar ya 'minority shareholder' ka ama parnoki mill ketdang asütsü. NPPCL asentenshia lapoktsü aser shishilembatsü nükjidong lir ta 3ACSL-i metetdaksüogo.

Osang angazükba agi 3ACSL aser State sorkar tsungda senden ka nung board of directors tasen ka tentetsü aser iba nung company nungi nisung 3 aser sorkar nungi 2 adentsü lemtetogo.

Mongsenbai ward nung tzü asüngtetba kol ka amenok



Pastor, Sentiyanger-i Mongsenbai Ward nung tzü filter ka meshitetsür külen MMC züngsem, Imlisanen Jamir den ward yimden tenzükertem külemi tangokba noksa nung angur. Mokokchung, 15th July, 2024

Mokokchung, 15th July (TYO): July 15, 2024 nü Mokokchung town kübok Mongsenbai Ward Ngati block nung tzü filter amenoka meshitetsü sentong ka agi. Iba tzü filter ya tang Mongsenbai Ward nungi adoksang MMC züngsem, Imlisanen Jamir-i tenla. Ngati Baptist Arogo, Pastor, Sentiyanger-i iba tzü filter meshitetsü.

Ngati block pur asoshi Minister, Metsübo Jamir ajanga tzüpu (borewell) ka tutsü aser iba tzüpu nungji tzü asüngtetba kol ka kanga nungdaka aliba ajiteta councilor Imlisanen Jamir-i iba filter tenla, ta osang ajanga metetdaksü. Iba filter amenoktsüba ya Imlisanen-i ULB election mapang pa adokyonga-madokyonga

inyaktsütsü nangzükba mapa ka liasü, ta osang ajanga ashi. Mapa agi iba ama inyaka sayuba asoshi Mongsenbai ward councilor, Imlisanen Jamir dang pelar ta Mongsenbai Ward Chairman, Marnungsang-i metetdaksü. Küm 5 tsüngta ano nübür asoshi mapa tajung aika inyaktsü imla-a atar, ta paisa moaja metetdaksü.

Assam Rifles temi Capt. (Late) N Kenguruse asoba anogobilemtet

Dimapur, Chiteni/July 15 (TYO): Assam Rifles temi Capt. (Late) N Kenguruse, MVC (P) sor küm 50 ajungba anogomung bilemteta liasü, shiba 1999 küm Kargil war nung linük asoshi takum bendanga agüja liasü.

kidang Assam Rifles temi July 15, 2024 nü sentong ya ayongzüka liasü. Iba sentong ya danga mapang dang nungi khenyongi balaka, kechiaser linük nung taküm Kargil Vijay Diwas Rajat Jayanti amungtsü lir.

lendong agi meketbanger liaka tasü tait sepai ka liasü aser pai pa asoshi mebilemi linük asoshi pa takum bendanga agütsü.

Pai tasü tait mulungsentsü dener linük asoshi bendanga agütsüba akhum agüja par

Capt. (Late) N Kenguruse, MVC (P) ya

Tsükchir matsüngdang pai tasü tait tatishitsü sayuba ajanga putu balala ajungmesor aser Assam Rifles temi Capt. (Late) N Kenguruse, MVC (P) teti bilemtetsü, ta ashi.

Zunheboto nung town councils mapa nung aniokba sentong agi



Zunheboto district kübok town council pezü (Zunheboto, Satakha, Aghunato aser Atoizu) nung councillor tem mapa nung aniokba sentong nung tangokba noksa angur.

Dimapur, Chiteni/July 15 (TYO): Zunheboto district kübok town council pezü (Zunheboto, Satakha, Aghunato aser Atoizu) nung councillor tem mapa nung aniokba sentong ka Zunheboto nung July 12, 2024 nü agia liasü.

election tiptema tesunep nung agitetba atema ajak dang pelaba lemsatap aser tarutsü nunga election mapang kasa tanüla alitsü ayongzüka liasü.

KT Sukhalu-i councillors dang parnok teinyaktsütem temulung agüja inyaktsü ayongzüka liasü.

Iba sentong nung Advisor, K.T Sukhalu; Advisor, G Ikuto Zhimomi; MLA, Er. Picto Shohe, district administration aser dangartem dena liasü.

Pai takok ngua aliba candidate ajunga nem tenüngsang agütsü aser district ajungkettsü asoshi kati ka den amalitep akatsü ashi.

Pai sentongtem kanga junga atonger inyaktsü nüngdakba ashi aser district tejakleni anir aotsü nenok mapa lir, ta councillor tem dang ashi.

Zunheboto DPDB Chairman tasenba aser MLA Er. Picto Shohe-i iba sentog nung jembidang district nung ULB

Paisa takok manguba candidate tem aser parnok yariritem dang nübürtem ajungtsü atema yariteptsü ajungshia liasü.

Sentong nung Advisor, Land Resources, G Ikuto Zhimomi-i ashiba agi, state sorkari temulung agüja inyakba ajanga Nagaland nung ULB elections agitet.

Advisor, Food & Civil Supplies and Legal Metrology,

Paisa councillor tem dang nübürtem asoshi nendaka inyaktsü ayongzüka liasü.

IMDH Mokokchung ajanga pelaba lemsateper

Dimapur, Chiteni/July 15 (TYO): Dr. Imkongliba Memorial District Hospital, Mokokchung nung gari anena ayutsü tesem tasen ka yangluba nung shilem tajung agiba kija aser lokti tentet balala dang IMDH tenüng nung pelaba lemsateper, ta Dr. S. Marina Yaden, Medical Superintendent, IMDH ajanga sangdong ka nung ashi.

atema sen 8,000; Wapang Kichu, Lijaba Lijen Ward, Mokokchung ajanga boulder dumper truck load ka, Takanungba Longkumer, Ungma Village ajanga stone dust pickup load ka tenla agütsü, ta ashi.

Nenoki rongsen jenti tenlaba ajanga shirangertem, mozüki nung amunger semdangertem, staff aser nübürtem kanga ajanzüktsü, ta sangdong ajanga ashi.

Commandant, 12th Assam Rifle, Mokokchung ajanga lisem truck loads 22 aser cement bags 100, Mokokchung Chamber of Commerce and Industry (MCCI) ajanga cement bags 100 agütsü, SP Mokokchung aser Fire Brigade Mokokchung ajanga tzü agütsü, Traffic Control Mokokchung nungi OC aser par teloki parking lane nung painting sütsü, aser IMDH Canteen ajanga Traffic personnel nem süngo jemdaksü, ta ashi.

Sangdong ajanga ashiba agi, iba tesem yanglutsü atema Mokokchung District nungi Legislature ter prongi sen 10,00,000; Kezhaleo Rulho, Contractor ajanga sen 3,00,000; Mokokchung nung aliba ward 18 ajanga boulder dumper truck load ka-ka atema sen 1,42,000; Saramati Construction (C/o, Mr. Bendang) ajanga sen 50,000; Taxi Association, Hospital Unit, Mokokchung ajanga sen 10,000 tenla agütsü.

Ano talisa Thsüvisie Phoiji NCS, Deputy Commissioner, Mokokchung ajanga tejangraba tulu nung anir mapa inyakba, taoba Ao Senden tir Chubawati-i anir senotsü lenmang bushiba aser Er. Toshikaba Executive Engineer (R&B), Mokokchung ajanga iba mapa ketdangsia inyadkatsüba atema pelar, ta kasa sangdong ajanga ashi.

Maneni Dr Takosunep ajanga boulder dumper truck ka

Tizit nung Tabletop Exercise agi



Dimapur, Chiteni/July 15 (TYO): Mock exercise atema terenemshiba ka ama Tizit, Mon nung July 15, 2024 nü Tabletop Exercise agia liasü.

SDRF den lungjemer ADC indang Conference Hall, Tizit nung Hombarnü agia liasü.

Tizit nung July 16, 2024 nü mock exercise ya Shillong nung 1897 küm magnitude 8.7 menoknok anokba ama agitsü lir. Tabletop exercise ya District Disaster Management Authority, Mon ajanga NSDMA, NDRF &

Iba mapang SDO (Civil) Tizit, Tumben P Tsanglao, shiba mock exercise nung Incident Commander lir, pai shilem agirtem pei teinyaktsü indang tongmelang agi rateta ashi aser pei nem nungloktsüba mapa jangja-jangja inyaktsü ajungshia liasü.

Atoizu Town Council züngsemtem tushiba sentong agi

Dimapur, Chiteni/July 15 (TYO): Atoizu Town Council züngsem tasen tawa shimteta alir nem tenüngsang agütsüba sentong ka Atoizu Jubilee Hall, Atoizu nung July 12, 2024 nü agia liasü, kong tesemdangertem tongti ama MLA, Er. Picto Shohe aden.

chairperson tasenba Kitoli Naje-i iba sentong nung jembidang jila asoshi la mandang lemsatap aser külem züngsempur aser lokti balala lenirtem dang lungjemer inyaktsü ayongzüka liasü.

Er. Picto-i sentong nung adeneritem dang Atoizu Town Council tenzükba indang rateta ashi aser tawa shimteta aliba councillor tem dang Atoizu Town Council tejakleni anitsü mangdang tajung yur terenlok, tesunep aser yimjung lenmang nung anitsü ayongzüka liasü.

ADC & Administrator, Atoizu Town Council, Nukutulu S. Venuh ajanga region nung administrative indang tongmelang agi rasaa ashi.

Atoizu Town Council nung

Iba sentong nung NCP tir Shiwoto Aye menden liasü aser Pastor, Atoizu Town Baptist Church, Rev Vikuto-i councillor tem bendanga agüja sarasadema liasü.



July 15, 2024 nü Bengaluru nung Karnataka Assembly nung Opposition lenir R Ashoka, BJP state Tir B Y Vijayendra aser party MLA tem den MLC temi Valmiki ST Corporation senotsü ochimeshii amshiba anema Maharishi Valmiki kürakyanglu anasa longkak aitdang tangokba noksa nung angur.

Madhya Pradesh sorkari anogo ka kija nung süngdong lakh 11 atem

New Delhi, July 15 (Agencies): July 14, 2024 nü Madhya Pradesh state sorkari ghonda 24 tsüngda Indore yimti nung süngdong lakh 11 atemba ajanga world record ka yanglutetogo.

Anogo ka kija nung süngdong lakh 11 atemba atema Guinness Book of World Records-i state chief minister, Mohan Yadav nem certificate ka agütsü.

Guinness World Record consultant, Nishchal Barot-i, "Indore nung ghonda 24 tsüngda süngdong lakh 12 dak tema atem. Iba Guinness world record title ji 'Most trees planted by a team within 24 hours' lir. Onoki iba ya July 13 aonung 7:03 ako nung tenzüka liasü aser taonung (July 14) 7:03 ako tashi nung tembanga liasü. Nikongdang 5:00 ako tashi

nungbo Indore-i reocrd tejenba tongteta liasü. Tejenba record ji Assam-i ghonda 24 tsüngda süngdong 9,26,000 atemba liasü. Züngya tejangjaji tesülen metetdaksütsü. Ajisüaka onoki record tasen yanglutetba certificate ji CM Mohan Yadav ket nung agütsüogo," ta metetdaksü.

Indore nung 'Ek Ped Maa Ke Naam' sentong nung jembidang Union home minister Amit Shah-i, iba yimti ya kanga merükmejua aliba, chiyungtsü tajung aser yimsüsüba tajung aliba yimti ka ta ajaki meteta lir. Ato kilonser Modi-i tenzüka 'Ek Ped Maa Ke Naam'

campaign kübok süngdong lakh 11 atemba sülenbo iba yimti ya 'green city' taka züngshitsü," ta metetdaksü.

Taoba ita World Environment Day anogomong nung Ato kilonser Narendra Modi-i 'Ek Ped Maa Ke Naam' campaign tenzüka liasü aser pai India nung dang masü saka alima tesem balala nung süngdong atemtüsü ayongzüka liasü.

Vikram Misri-i Foreign Secretary mapa agizükogo

New Delhi, July 15 (Agencies): Hombarnü Vikram Misri-i Foreign secretary of India mapa agizükba sülen ministry of external affairs (MEA)-i pa nem tenüngsang agütsü.

MEA otongdar, Randhir Jaiswal-i X ajanga, "Tanü Vikram Misri-i foreign secretary mapa agizükogo. #TeamMEA-i foreign secretary Misri pelaa agizüker aser kümsük takok ngua inyaksü asoshi sarasademtsür," ta metetdaksü.

Foreign Secretary menden atema ministry of external affairs-i Vikram Misri tenüng benoka liasü iba sülen Appointments Committee of Cabinet (ACC)-ia ibaji agizük.

Misri-i Vinay Mohan Kwatra melenzüker.

July 14, 2024 nü External Affairs Minister S Jaishankar-i foreign secretary Kwatra den tepila sentong agia liasü. Jaishankar-i, Kwatra-i tesüiba küm ter tashi India nung foreign policy aser national security tsütsü shilem tulu agiogo, ta metetdaksü.

Jaishankar-i X ajanga, "Foreign secretary menden nungi anisüngzüker Vinay Kwatra-i foreign policy aser linük security tsütsü kanga

nendaka inyakba aser mapa tajung aika inyakba atema pa dang pelar. Talisa testüba küm ter tsüngda pai asen mapatong aika nung asalentong yangluba nung shilem tajung agia inyakogo. Tarutsü nunga pa maparen balala nung takok angutsü atema sarasademtsür," ta lemsatepa liasü.

Arrshi küm 59, Vikram Misri-i 1997, 2012 aser 2014 küntem nung Ato kilonser asem- Inder Kumar Gujral, Manmohan Singh aser Narendra Modi nung indang private secretary inyaka liasü.

Misri ya 1964 küm Srinagar nung aso aser Gwalior nung zünga liasü. Pai Delhi University's Hindu College nungi bachelor's degree angu aser XLRI nungi MBA renema liasü.

Misri ya India ambassador to China-a inyakogo aser 2020 küm Galwan Valley nung India aser China sepaitem tsüngda rara tulu adokba sülen linük ana tsüngda ken o jembiba nung pai tongtibang shilem agia liasü.

Tamalen pa Brussels aser Tunis nung aliba Indian embassies nung inyak. 2014 küm pa India ambassador to Spain inyak aser 2016 küm India ambassador to Myanmar inyaka liasü.

Rajya Sabha nung BJP-i aniba NDA nungi MP 101 dang kümogo

New Delhi, Chiteni/July 15 (Agencies): Rajya Sabha nung BJP züngsem pezü- Rakesh Sinha, Ram Shakal, Sonal Mansingh aser Mahesh Jethmalani nung kümsük abensaba ajanga BJP MP ajema kümogo; tamalen BJP züngsem pezüji ruling party tetuyuba nung linük Tir, Droupadi Murmu-i 'non-aligned members' ama shima liasü.

Iba sülen BJP züngsem pezü jagi Ato kilonser Narendra Modi-i aniba sorkar nung aden.

Rajya Sabha nung BJP züngsem pezü kümsük abensaba sülen tangbo Rajya Sabha nung BJP MP 86 dang kümogo aser National Democratic Alliance teloktep nung aliba party tem nungi züngsemtem densemabo ajak senteper 101 dang kümogo. Züngsem 245 aliba House nung majority mark 113 lir anojungi House nung parnok minority kümogo.

Tang Rajya Sabha nung züngsem 225 dang lir.

Ano külen Rajya Sabha nung Congress-i aniba opposition INDIA nungi züngsem 87 lir. Congress nungi MP 26, TMC MP 13, AAP nungi MP 10 aser DMK nungia MP 10 lir.

Ano Rajya Sabha nung BJP mesüra Congress na den sendaktepa maliba party tema lir; item party tem rongnung BRS densema lir. Tanüngba MP temji shimba aser independent MP tem lir.

Rajya Sabha nung BJP MP ajema kümogo, anungji joko Rajya Sabha nung bill balala agizüktsü atema sorkari NDA nung densema maliba party tem teyari nungdaksü. Item

party rongnung Tamil Nadu nungi AIADMK aser taoba mapang Andhra Pradesh Chief Minister Jagan Mohan Reddy indang YSR Congress Party densema lir.

Taoba mapang Odisha Chief Minister Naveen Patnaik indang BJD-ia sorkar pusema liasü saka taküm May-June ita nung agiba assembly election nung BJP-i BJD sorkar atsüngdok, anungji joko parnoki House nung sorkar pu-masemtüsü.

BJD nungi Rajya Sabha MP 9 lir. AIADMK-i sorkar yaritsü memelungra aser BJD-ia sorkar pu-mesemra BJP-i shimba MP tem teyari bushitsü. Tang Rajya Sabha nung shimba MP 12 lir.

Bank of Baroda बैंक ऑफ़ बड़ोदा

CIRCULAR ROAD BRANCH
Ground Floor, Faith Building,
Near Kharmahal Traffic Point,
Dimapur, Nagaland- 797112
Email: vjdima@bankofbaroda.co.in

[Rule 8(1)]
KIOJEN AGIADOKBA NOTICE (For Immovable Property)
Securitisation and Reconstruction of Financial Assets and Enforcement of Security Interest (Second) Act, 2002 aser Security Interest (Enforcement) Rules, 2002 nung Rule 3 kübok Section 13(12) nung agüja aliba tashi amshia tsünglanglen sign süa alir **Bank of Baroda, Circular Road Branch, Dimapur** nung Authorised Officer-i **07.02.2022** anogo nung Demand Notice ka ajanga sen apur

- MS. LEMEI PHOM (Sen apur)**, D/o M Hepong Phom, H/No. 273, Block- 4, Signal Angami Village, Dimapur- 797112, Nagaland.
- MR. HT YANGER PHOM (Guarantor)**, S/o M Hepong Phom, H/No. 273, Block- 4, Signal Angami Village, Dimapur- 797112, Nagaland.

dang notice nung shia aliba **sen 29,20,592.30 (Rupees Twenty Nine Lakhs Twenty Thousand Five Hundred Ninety Two and Paise Thirty Only)** notice anguba anogo nungi tenzüka anogo 60 tsüngda agüjang ta metetdakja liasü. Ajisüaka sen apuri senji meyipa magütsüet, anungji sen apur aser public dang, tsünglanglen sign süa aliri iba Act nung Sub section (4) of Section 13 aser Security Interest (Enforcement) Rules, 2002 nung Rule 8 ajanga agüja aliba tashi amshia tsünglanglen shia aliba kiojenji **2024 küm July 11 anogo** nung agiadokogo, ta sangdonger.

Talisa sen apur aser public dang shia aliba kiojen dak sendakba nung kecha inyangsangshi masütsü tekümdangtsü metetdaksür, mesüra Bank of Baroda-i **Rs. 35,17,786.75 (Rupees Thirty Five Lakhs Seventeen Thousand Seven Hundred Eighty Six and Paise Seventy Five Only)** den **11.07.2024** anogo nungi sen tetemlok aser tanga charges meshitsü.

Section 13 kübok sub-section (8) nung ajemdaker sen apur dang mapang shidak nung kiojenji alangzüktsü metetdaksür.

Kiojen osang tejangja:
Signal Angami Village, Dimapur, Nagaland nung Ms. Lemei Phom, D/o H Hepong Phom tenüng nung aliba Patta No. 145, tasazük 0B-3K-9L nung aliba kiojen ajak.

Bounded by:- **North tsütsülen:** Tetsüng Lenmang, **South tsütsülen:** Link Road, **East tsütsülen:** Nyingpen'er kimong aser **West tsütsülen:** Teyievi'er kimong.

Date: 12.07.2024 Authorised Officer
Place: Dimapur (Bank of Baroda, Circular Road Branch)



NEET-UG exam 2024 nung ochimashi aser nursing college nung ochimashi anema July 15, 2024 nü Bhopal nung National Students' Union of India (NSUI) züngsemtemi longkak aitdang police-i parnok senshidaksütsü atema tzü khaloktsüba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, JULY (CHITENI) 16, 2024

Trump dak kechiba akha ?

United States nung taoba tir aser taküm 2024 küm November ita nung US tir election nung Republican telok nungi tokteptsü merangsang, Donald Trump yakanü lokti senden ka nung jembia alidang anasa aliba ki kilem ka nungi nisung kati khasettsü merangba mapaji taoksatsüka aser pa taküm kümzükbaji tesümgangtsüka lir. Atangji, iba ama tongtibang lenir taküm ka samatsütsü merangbaji shibai aser kechiba ta ajaki metetnüa bilemer. Aji oda, pa dak injang khaloktsüsangbo Secret Service mitkartemi khasetogo, anungji pa tenüng jangjaba dak alaka kechiba pai Trump ama tongtibang lenir ka taküm samatsütsü merangar ajibo meshitetsüa akok, saka akok tashi Federal Bureau of Investigation purtemi bushisüngdanga kuli karbo ngutettsü imlar. Atangji, nisung ka khasettsü bilemba nisungji yiar amato aser pa mulungjang nung par lima lenirtem dak tejashiba tulu alitsü. Item ama tapayu mali pei lima yimten lenir ka taküm samatsütsüa jashiba kuliji, ashiko, pa makamaitba mesüra pa mapa kar nung tamakok anguba agi jashibabo masütsü saka Trump-i inyaksü bilemba sentong aser pai jembiba ken o kar agi pa mulung yiru asütsüa akok. Akhidangbo, US election nung jembiba onükji rongsenren renloktsü, tangar pur bendanger kintem den tesendaktep tajungba yanglutsü aser ita petinui atutsüba onüktem liasü, ajisüaka tanübo item onüktem dang nungibo US asoshi tongtibang aser rongdak nungdaksa jembiba onüktemji tetsür o tetsür na aser tebur o tebur na apuani kuma kibong akümtsü melatsü asü memelatsü (?) ta asüba onük den ano US nung lisopurtem dang nungibo bendangertemang nütsüng teimba kuma aotsüsa kumadokba teblemstsü aser tebok nung tanur raksaa endoktsü melatsü asü memelatsü (?) ta asüba onüktem lir. Item onüktem rongnung Trump-i US nung arua alir bendangertem par lima nungi odaktsütsü aser talisa Muslim nunger kiralongrartem makdoktsüba onüktem indang kanga sashia jembir. Atangji, USA ya Tsüngrem dang sarasademer Laishiba nung amendaker akümba lima ka lir. Ibayongji, tanü tashi US tir inyaksü tenangzükba agidang Laishiba nung nemdaker tenangzükba agir aser parnokbo sen nung tashi 'Tsüngrem dak onoki temulung alemer' ta ajenloker amshir. Alima nung nisung asünungji, US nungertemi Tsüngremi maginüba zünger mezüngma inyaka alitsüa akok saka parnoki Tsüngrem dak metaloker aser iba tashi aser kolok jagi alima ajunga amokbanga yimsü asür. Aji oda, US nung yimten telok tetsütiba ana Democratic Party aser Republic party na lir. Tang US tir Joe Biden ya Democratic telok nungi aser Trump ya Republican telok nungi lir. Atangji, telok ana pronglai Tsüngrem dak amanger aser Laishiba amshir, ajisüaka Republic teloki akhi amanga aruba aser beshiba tamangba yimsüren nungi kangabo mepilaner saka Democratic telok purtemibo putu yimya dak apet sobaliba melenshia onür. Item onüktemji nübortem rongnung benoka jembidang, atangji, nisung karbosa temulung yirutsü aser teimla samatsüa akok, anungji itemji lenirtem asoshi lendong nisung akümer. Yakanü Trump dak akhaba yabo Secret Service mitkartemi junga manük aser mererpangba agi khadaksü amaika adoker, kechiyong Trump o pa dak akhasang na tetsüngda am 25 (150 metres) shi dang pilar liasü. Ashiko, karibo aji Trump-i nübortem nem meima bilemdaktsütsü asoshi asaa atongba sentongang ka asütsü ta temulung melemi ashitsüa akok, ajisüaka shibaibo pei narong peta khang ta ser tendaktsü ? Atangji, Trump-i ashiba ama pa takümji shingaia masü Tsüngremi dang kümzük. Ashiko, pa US tir ano khen inyakdaktsütsü atema Tsüngremi pa taküm kümzük asütsüa akok.

OLEMSABANG

ELECTION SHIA AO LIMA NUNG KECHI ATALOKER ASER AOR-i KODA SHILEM AGIR...???

~ L. Kika Pongener.

Asen Naga lima nung Assembly General Election agir küm ana majungdang Lok sabha Election agi, aser ano ita ana- asem tsüngda nung ULB Election agiogo. Aji oda, küm ana tetsüngda ka nung Election asem atong-atonga agia arudang, asen Aotsür Aor-i koda shilem agi (?)...ta khen shisadangi. Aser temelenshitsü kar lira meyipa reprangshia melenshitsü merangi. Naga nunger tangar kintemi asen Aor dang 'Samanir' (Pioneer) kin ta ajar, aser aji shibai nunga ta ashitsü ? Aser iba naroküm tenungji tanü asenoki aazükba masü, otsüla-oboula nungeri parnok mapa tajung agi aazüka yutsüba senmang lir. Ajisuaka, tanübo iba senmangji asenok sasa asenoki mesen-metoea sensa-masar. Anungji asen Aotsür Aor-i asen mapatem khen meyipa reprangshitsü mapang ka tongogo. Aor-i takzü-takponga jembiba o ka 'Tanüri tenung makok' ta jembir. Kibong nung tanür ka sor tsüraburi tetsü- tebou nokinketer, kika-suchir, konang-naroküm tenung naroka jatsür, saka tanür karibo iba tenungji makoker. Tenung makokba tanürji teti shiranga dang alir, chiyungtsüa bangnanga mechiyonger, paksu-paksua kongrasüka dang, tenung tajung-to asen dak mapet 'Tenung makok' kuma odagi. Atangji, Samanir kin-to tanübo tangar menudong aser tangari tetla-tetshiba kin ka kuma odagi.

Tangar kintem dang kangasa taaktsüka, Election agiba shia asen Ao lima nungbo, Naga lima tanga tesem kecha nunga matalokba tansutsü mapa aika-sa ataloker. Iba ya asen Aotsür Aor asoshi konang masü, saka maaksu tulu ta angatettsüla. Tesuiba Assembly General Election nunga, asen Ao lima nungbo kanga rongrongtepa, raratepa, züktepa, nisung pua bener oa züka merenshiba aser nisunga dena tepsetogo. Ano Lok Sabha Election nunga asen Ao lima yimtsüng kar nungbo, putu yimsüsüri acha-ayanga yimer ajak meyong Vote inoktsüba otsüa angazükogo. Aji oda, angazükba amaji shitak inyaka lira...Election Commission temzüng-ozüng agi memelaba mapa ka yimsüsüri anir inyakbaji kangasa tim masü. Aji oda, temzüng-ozüngi memelaba mapa ka yimsüsür- iang anir inyakra (?) Nubur dang temzüng-ozüng shitak beshiang ta koda ashitsü...???. Ano kanga tesusatsü kaji, temzüng-ozüngi memelaba mapa inyakba nguaka, Tsüngrem lar, arogo nung tenzüker, laishirtem-ia ola madoki repranga lia inyakdaktsür...!!! Kangasa tesungmangtsüka...Aotsür Aor- bo arogo nung tenzüker aser laishirtema karbo Election nung tashiyim mapa inyaktepba nung tongti-shilem agiainyakba angudang nubur aika kanga sungmanger...!!!??? Atangji, Election agiba shia asen Ao lima nungbo, tanga lima kecha nunga matalokba, tansutsü mapa aika-sa ataloker. Shitakba agibo tanga lima dang nungi, Ao lima nungang kanga tesungjemba aser shitakba inyakyimji inyaksüba sernung...!!! Election agiba shia Ao lima nungang tangar dang tamajungba tashiyim mapa inyaktepba angudang tangar kin dang kangasa aakseta bilemer.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

USCIRF-i State Dept dang CPC list nung Pakistan züngoktsü mepishi

Lahore, July 15 (Agencies): U.S. Commission on International Religious Freedom (USCIRF)-i maneni US State Department dang Pakistan linük ya "Country of Particular Concern," (CPC) list nung züngoktsüla, kechiyong iba linük nung Tsüngrem mezüngmeshiba ozüng nung ajemdaker Khristantem aser yimsü temeden anema inyaker, ta metetdaksü.

USCIRF-i CPC nung züngoktsü atema linük aika benokyonga U.S. State Department-i ajakjibosa magizüker, ajisüaka 2018 küm nungi tenzuka küm shia Pakistan yabo CPC nung züngoka arudar.

Pakistan linük nung maneni yimsü temeden balala anema inyaker, Tsüngrem mezüngmeshiba ozüng tim mesüi amshir, Khristan tetsürtem densema minority tetsürtem kangshia Islam yimsü dangi meyipdaksür aser Khristantem densema minorities anema inyaker, ta 2024 USCIRF report ajanga metetdaksü.

Pakistan nung Tsüngrem mezüngmeshiba ozüngtem, talisa Pakistan Penal Code kübok Arrla 295-A, B aser C ozüng tim mesüi amshir. Pakistan nung nütsüng shilem 96 bo Muslim nungertem lir, aser iba linük nung Khristantem densema minorities anema mangyangtsü atema item ozüng tim mesüi amshir.

USCIRF report nungjisa Tsüngrem mezüngmeshiba ozüng kübok Khristantem, Hindu nungertem aser Ahmadi nungertem nem tiyazü nung tai tonglokja tepuokdak ayur.

Tsüngrem mezüngmeshiogo, ta tiyazü nung tai tonglokja loktii nisung tepseter, ken o mangadangi nisung tepseter, tsübudaksür mesüra amokmerener, ta USCIRF-i metetdaksü.

Tawa Pakistan nung Khristan lanur, Zohaib Masih-i Tsüngrem mezüngmeshiogo ta tai tonglokja apuba sülen reshikangshia liasü; item ama tatalokbatem ajanga item ozüng tim mesüi amshiba kuli sayur, ta USCIRF-i metetdaksü.

Kasa report ajangasa, Khristan aser Hindu tsürtem kangshia puer aoba sülen Islam yimsü dangi meyipdakja Muslim nungertem den kibong kümdaksür, ajisüaka aibelenertem nem temerenshi magütsür, ta metetdaksü.

USCIRF report ajangasa Pakistan linük nung Tenla kitem, tekülem kitem aser Ahmadi nung mosques raksatsüba ya tebilemtsü onük tuluka lir, ta metetdaksü.

Item kuli nung ajemdaker USCIRF-i US State Department dang Pakistan ya CPC list nung züngokba ajanga

iba linük anema tenokdangbatem benoktsü aser ibaji ajanga linük nung yimsü temeden jenjang tajungba akümtsü, ta metetdaksü.

USCIRF-isa Pakistan nung yimsü temeden aser meimchir temeden ajungkettsüba lokti tentettem US-i nungita yaritsüla, ta mepishia metetdaksü.

Tawa State Department-i Pakistan dak alia Myanmar, People's Republic of China, Cuba, Eritrea, Iran, Democratic People's Republic of Korea, Nicaragua, Russia, Saudi Arabia, Tajikistan aser Turkmenistan linüktem CPC list nung züngokogo.

USCIRF-i state department dang Pakistan ya CPC list nung züngoktsü benokbaji linüktem aser Arogo lenirtem aikati pelaa agizükogo.

Church of Pakistan Tir, Azad Marshall-ia, USCIRF report ji ajanga Pakistan nung minorities atema tensa tamajungba akümba noksa sayur, ta metetdaksü.

Osangbener den jembidang Marshall-i, "Alima linüktemi item tebilemtsü onüktem atema Pakistan rongshiba den külemi akokba tashi nungita yaritsüla. Onoki Pakistan nung minorities ajak kümzüka sadoksadoka lidaktsüner, aser iba atema inyaksüji linük khuret lir," ta ashi.

Ajisüaka Pakistan nung ketdangsertemibo USCIRF report aija, sorkari yimsü balala amangertem ajak tesüner nung alitsü aser temeden kümzüktsü atema inyaker, ta ashi.

"Onoki senso ajak kümzüka alitsü aser sensotem temeden

ajak kümzüktsü atema inyaker. Onoki inyakba mapatem sendoker osang tai prokbaji onoki magizüker," ta Pakistan Ministry of Religious Affairs otongdari metetdaksü.

Sorkar aija Advocacy group Rawadari Tehreek (Movement for Equality) nung chairman, Samson Salamat-i, Islam yimsü tenüng amer loktii nisung tepsetba manenba aser minorities maneni reshikangshiba tatalokbatemji sorkari jembiba o den meputeper, ta ashi.

"USCIRF-i Pakistan 'Country of Particular Concern' nung züngoktsü benokbaji ajanga linük nung yimsü temeden anema inyakba nokdangtsü asoshi rongdak süa inyaktsü ayongzüker," ta Salamat-i osangbener nem metetdaksü.

Paisa, tesüiba küm ishika tsüngda Pakistan nung Tsüngrem mezüngmeshiba ozüng kübok tai tongloktsüba kanga bulua ataloker; ibaji ajanga Khristantem anema inyakba kanga bulua akümer, ta metetdaksü.

2023 küm kija nunga Tsüngrem mezüngmeshiba ozüng kübok Khristantem aika nem tai tonglokja tepuokdak ayu. Punjab province kija nunga nisung 552 jail nung puoka liasü, ta Lahore nung amenoka aliba Center for Social Justice-i metetdaksü.

Taküm küm tenzükter June ita tashi nunga Tsüngrem mezüngmeshiba ozüng kübok nisung 103 nem tai tonglokja liasü, ta parnokisa metetdaksü.

ANOGO ABEN TSÜNGREM DEN

Merumeru maliba Khristan

"Mopung koleni onüdir ilenji aoner, aser nai iba olaji angashir, saka aji kolen nungi arur, aser koleni aor nai memetet; tanela nungi asoba ajak yamaji lir" (Yohan 3:8).

Merumeru mesü-i temeim aketba Khristan ka asütsü asoshi kechi nüngdaker? Asenok shi jangraba toktsür Tsüngrem aser tanga tsüngdang temeim mapa inyaka tenzüktsü kechi nüngdaker ?

Mezüngbuba nung, Khrista den ne jenjang nung azüittsüla. Na Khrista nung ali nung, pa Tsüngrem yimya ne den melungjemra Khristai meimba ama nai memeimtettsü.

Tanabuba nung, anogo shia ne tejenba temenen shi taküm kangki nung angenloktsüla aser Tsüngrem chir ama tanela agi sünga alitsula. Shitakba nung Tanela Temeshiji asenok dak alir aser pai aniba ama jajar, ibai tesüngmangtsü ka, saka aikati aji angatettsü makoker. Tebilemtsüji tasen masü. Nikodima temetetba nisung ka liasü saka pai Tanela mapa mangatet. Anungji Yisui pa dang ashi, "Mopung koleni onüdir ilen jagi aoner aser Tanela mapa-a yamaji" ta ashi (Yn. 3:8). Tanela taküm inyakyim ka ama kümdaktsütsü merangbaji mopung aputsü merangba ama lir. Asenokbo joko pai anir, "Kechiaser shirnok Tsüngrem Tanela agi anir, parnok Tsüngrem chirtem lir (Rom 8: 14). Kodang asen tashi atemer, asenoki pa tashi ngutetter. Tsüngrem temeimji mapang ajak nung kasa aser anasatiba teyarir lir.

ICC-i India nung Sunita indang ministry nung yariteper



July 15, 2024: Northern India nung Sunita ta ser tetsür kati la indang evangelism ministry ajanga Khrista osangtajung proker, ta International Christian Concern (ICC)-i metetdaksü.

Sunita-i Bible training agiba sülen la indang ministry tenzük aser lar yimdak lai ketdangtsüa tekülem sentong agir.

ICC-ia la indang ministry nung yariteper, ta ICC-i metetdaksü.

ICC indang Bikes & Bibles program kübok ICC-i la nungita yariba ajanga tangbo lai anasa aliba yimsüngtem-a tonga oteta Tsüngrem temeim aser Khrista osang tajung lemsateper. Lai maneni tekülem sentong aika

jangraba ama Tsüngrem tenzükter, ta ICC-i metetdaksü.

Kibong tsütsülen nungi timtem ajangshiba ajanga lai la mapang ajakbo Tsüngrem tenzüktsü asoshi bendanga magütsüteter.

Lar kibong aser Tsüngrem tenzükba wadang nungittsü atema lai la dak aketba sü arrba sempet (tailoring skills) amshir. Ajioda ICC-i la atema tailoring business ka tenzüktsüogo.

Laisa Arogo nung tetsür tangartem nem-a tailoring training agitsü atema training maongka lapoktsüogo.

Sunita-i, "ICC ya onok asoshi temoatsü tuluka lir. ICC-i kü nem sü arrba dokan ka lapoktsüogo. Iba business ajanga senotsü ajangzükta ozüng kibong nüngdak periba den külemi Tsüngrem tenzükba wadang nunga amshitetsü, ta kü kinüngbu künati amanger," ta metetdaksü.

"Iba business ajanga onoki tangar dak memetaloki Tsüngrem tenzükba wdang inyaktetsü. ICC-i onok dang temeim mapa sayuba atema parnok dang kanga pelar," ta laisa metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Tajidaksü

(adj) tarendaksü (hesitate, apprehension)

* Lenmang tamajung nung senzüsüba tajidaksü lir.

Tajinütsü

(adj) tereprangnüsü, jangratema reprangba (appealing, attractive)

* Asen nükdang tajinütsü oset ajakbo tajung masür.

OLONG PAITEP # 6847

16x16 crossword grid with numbers 1-16 indicating starting positions.

TIPIEN

- 2. Auo nung chiyongsü asenba
5. Mangyimba mapang
7. O tamendakdak
8. Pei dak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A ___ g
6. Mopung apodoka
9. Tongtipang tagitsü
10. Menungra bilem
11. Aiür
13. S ___ k
14. T ___ r

OLONG PAITEP # 6846 TELANGZÜBA

TIPIEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER MA



Film ka nung ken teimtiba alibaji 1932 küm sayaba Indrasabha film lir. Iba film nung ken ajak agi 71 lir Inder Sabha ta ajaba Urdu play ka nung ajemdaker yanglu. Indrasabha ya Jamahedji Jehangirji Madan-i direct asü aser Nissar, Jehanara Kajjan, Abdul Rehman Kabuli aser Mukhtar Begum nungeri tongti shilemtem agi. Ken 71 ji music director Nagardas Nayak-i mejema aten aser Guinness Book of World Records nung "Most songs in a film musical" ta zülüoka lir.

Meitei Alliance-i Jiribam nung CRPF jawan khasetba aitsür

Imphal, July 15, 2024 (Agencies): Jiribam district nung CRPF jawan ka tepsetba aser asem yirutsüba aitsür ta Meitei Alliance-i metetdaksü.

July 14 nü 20th Battalion CRPF aser Manipur Police külemi mita aodang lendong atalok.

Iba lendong nung asüba CRPF jawan ji Bihar nungi Ajoy Kumar Jha (43) liasü.

"Pai linük tenzükba nung taküm bendanga agütsüba teti akhümtsüba bilemtetsü" ta Meitei Alliance-i ashi. Parnokisa

Jha'er kibong den asüku lemsatepba metetdaksü aser yirua alirtem tekaratiba nung taneptsü angutsü moatsü.

Chin-Kuki telungpurtemi arrtsü adena arur Manipur nung amaker. Kuki nunger teimba ser aliba tesemtem nung Meitei nunger samatsütsü tenzükba sülen tensa mejungi aküm ta Meitei Alliance-isa metetdaksü.

June 10, 2024 nü Manipur CM'er convoy amak aser idangji sepai ka yirutsü ta parnokisa ashi. Chin-Kuki nunger

telungpurtemi Jha tepsetba ya sepai 12 buba lir ta Meitei Alliance-isa ashi.

India sorkari arrtsü adena kiralongraba anema meinyaker aser iba atema jashir. Jha tepsetertem indang video kar social media nung prokshir saka tang tashi pa khasetertem mapu lir ta parnokisa ashi.

Meitei Alliance ya November 2023 nung tenzük aser iba nung India, Australia, UK, Europe, Canada, USA aser Nicaragua nung aliba Meitei nunger teloktem dena lir.

Mizoram nung MMFSL nung mapa inyaker 20 dak tai tongloktsür

Aizawl, July 15, 2024 (Agencies): Mizoram Police-i Mahindra & Mahindra Financial Services Limited (MMFSL) nung inyaker nisung 20 anema chargesheets ana benokogo.

Parnoki company sasep nung Rs 150 crores shi ashikülaka agiba atema tai tongloktsür. Parnok ya Mizoram aser Assam nung alirtem lir.

Jakir Habibur Hussain (41) ta ser nisung kati tasa atongba sülen parnoki Northeastern state ajak nung Rs 150 crores shi ashikülaka agi ta bushisüngdang arudang putet.

Hussain ya MMFSL nung area manager inyaker aser pai Mahindra Finance Company den

külemi iba mapa ya inyaker. Pamok den Aizawl nung amenoka aliba CK Hyundai Cars, NBE TAA, Rafael Nissan aser AIDU Motors Renault car dealers-i yaritep.

Police-i bank accounts 177 nung Rs 5 crores shi sota lir aser Rs 10.5 crores alang gari 15 pua lir. Police-isa ghost customer loan files 2035, forged stamps & seals 25, laptops 3, mobile phones 10, SIM cards 35 aser kulikaket aika ngutetogo.

Parnoki Mahindra Finance Limited kübok business head ama sayua taila bank account lapok.

MMFSL Circle Head, Ankit Bagree-i Area Business Manager Jakir Hussain ajanga senotsü

ashikülaka agiba osang sangoktsüba sülen March 20, 2024 nü PS Aizawl nung FIR ka benok.

March 29, 2024 nü ano MMFSL Business Head, Chanpreet Singh-i Crime & Economic Offences PS tsüngda FIR ka benok.

Iba ken o maneni bushisüngdang südar aser police-i ano iba mapa nung shilem agirtem aputsü bushidar.

Aizawl West District nung Deputy Chief Medical Officer, Dr Lalnienga dang masüngdangtepi MMFSL kübok loan agizüktsü mapa inyakra atema pai tanga FIR ka benok.

Assam CM-i Hindu-Muslim politics dang inyaker: Akhil Gogoi

Guwahati, July 15, 2024 (Agencies): Rajiv Dal president Akhil Gogoi-i Lower Assam nung ali anenzüka aoba aser tzümetsüng tensa asadanga senzüogo.

Hombarnü pai Dhubri district kübok yimtsüngtem sema senzü aser idangji Brahmaputra ayonga ajanga Kamrup, Barpeta, Goalpara aser Dhubri nung teraksa bentsür aruba angu.

"Assam chief minister aser

water resource minister nati Lower Assam nung nübertem khuret atema mebilemtsür. Hindu-Muslim politics nung temulung agütsüba ajanga Assam nung alirtem khuret mekottetsü" ta Akhil Gogoi-i ashi.

"Chief minister-i Lower Assam nung tzümetsüng agi kongshia aliba tesemtem mesemdanger. Chief minister-i selfie agitsü dang bilemer saka chichiba tebilemtsütem atema

kecha meinyaker" ta paisa ashi. "Assam sorkari mapang talangka Lower Assam senzüka yutsür. Sorkari tzümetsüng aser ali anenzüka aoba koktetsü atema mapatong tajung yanglua inyaksüla" ta Gogoi-isa ashi.

State sorkari Centre dang relief package ama Rs 50 crores bosa meshitsüla aser ali anenzüka aoba den tzümetsüng ya 'national disaster' ta sangdongtsüla, ta Akhil Gogoi-isa ashi.

Manipur kübok Kakching nung KCP-N telungpur 5 apu

Imphal, July 15, 2024 (Agencies): Manipur nung Kangleipak Communist Party - Nongdrenkhomba (KCP-N) ajanga nisung pur aotsü aser tashiyim agi sen sarutsü tasa atongba matalokdaksü.

Central aser state forces külem telok kati KCP-N tasa raksatsü aser parnok ket nungi

pistol ana aser gari ka ngutetogo. Osang tejangja ka angazükba sülen Kakching district police aser Assam Rifles külem telok kati Deobarnü Kakching Khunou nung mita aodang telungpurtem apu.

KCP (Nongdrenkhomba) züngsemtem ya Soibam Lanchanba Meitei (25), Soibam

Manoj Singh (27), Heisnam Dipak Meitei (39), Nameirakpam Nelson Singh (20) aser Nongthombam Leishemba (23) nunger ta jangjaogo ta police-i ashi.

Parnok ket nung pistol ana, magazine ka, mobile phones 3, camouflage outfits 3 aser gari ka apu.



Manipur nung July 15, 2024 nü 20th Anti-Repression Day mongogo. Kangla Fort nung tetsürtemi mangsa lungkak aitba bilemteta Manipur Press Club, Imphal nung Observation Committee Anti-Repression Day 2024-i sentong ka ayongzuka agi. July 15, 2004 nü tetsü 12-i Kangla Fort (taoba Assam Rifles Headquarters) nung Thangjam Manorama tepuokdak tashiyim agi shi nung medemba aser tepsetba anema mangsa lungkak aita liasü. Tanü agiba sentong nung retired Session and District Judge Aribam Noutuneshwari Devi, Manipur University Head of Law Department Dr. Yumnam Premananda aser CSOs züngsem aika aden.

Sri Lanka SC-i taoba tir Sirisena dang temenok agütsütsü tuyu

Colombo, Chiteni/July 15 (Agencies): Sri Lanka indang Supreme Court-i Hombarnü taoba tir Maithripala Sirisena dang 2019 küm Easter anogo kiralongrartemi amakba mapang asürtem nem temenok August 30 nü tashi nung agütsütsü tetuyuba agütsüogo.

Sirisena-i, Supreme Court dang ashiba agi, sen million 100 agütsütsü tetuyuba agütsüba nungi sen million 58 bo agütsüogo. Paisa, tanungba sentem ya küm trok tsüngda agütsütsü atema mepeshia asüngdangogo.

2019 küm ISIS den sendaka aliba local Islamist extremist telok National Thawheed Jamaat nungi pei temang nung bomb alenoker pokdaksürtemi Easter anogo Sri lanka nung tekülemdak asem aser luxury hotel kar maka nisung 270 tepseta liasü.

Supreme Court-i Hombarnü Sirisena dang temenok

agütsütsü aliba tanungbatem August 30 nü tashi nungbo agütsütsü tetuyuba agütsü liasü.

2023 küm January ita Supreme Court-i fundamental rights petition ka nung Sirisena, shiba iba lendong atalokba mapang tir liasü, pa aser pa kübok police aser defence tekolaktem dang iba lendong nung akoksartem nem temenok agütsütsü tetuyuba agütsü liasü.

2019 küm Easter anogo tesem balala amakba menokdangtetba atema Fundamental Rights petitions nung shisema aliba respondent temi petitioner tem indang fundamental rights anema inyaksangshi, ta SC-i ashi.

Petition nung shisema aliba respondent tem rongnung taoba tir Sirisena, taoba defence secretary Hemasiri Fernando, taoba police chief Pujith Jayasundara, ex-National Intelligence Service chief

Sisira Mendis, aser taoba State Intelligence Services chief Nilantha Jayawardena nung densema lir.

SC-i, taoba tir Sirisena dang temenok sen million 100, taoba police chief Jayasundara aser taoba State Intelligence Services chief Jayawardene na dang sen million 75 aser taoba defence secretary Fernando dang sen million 50 temenok agütsütsü tetuyuba agütsü liasü.

Taoba National Intelligence Service chief Mendis dang SC-i sen million 10 temenok agütsütsü tetuyuba agütsüogo.

SC-i ashiba agi, item sentem ya 2019 küm Easter anogo akoksartem nem temenok agütsütsü atema bendentsü nüngdaker.

Iba lendong nung asür kinungertem nem temenok agütsütsü atema tatembangbuba anogo ji 2023 küm July 12 nü atakzüksür liasü.

PELABA LEMSATEPER



(06.06.1933 - 08.07.2024)
"SHIRIMANG AYIMER PARNOKIMOA, KECHIASER PARNOK SUNEPTSÜTSÜ". MATHI 5:4

Asür Mrs. Roseland (W/o Late. I Moachiba, Mopungchuket)-er kinungertem ajanga kija, kibong aser lokti telen balala nungi ozü mulung zürep mapang shisatsü, nübo, rongsen aser sarasadem agi nungita yariba asoshi nenok ajak dang temulungjang taroktiba nungi kümrem pelaba lemsateper. Nenok kija taküm shia dang alakteta pelar ta meshitetba asoshi nemjema melidaksüner. Tsüngremi nenok takümtem maneni moajang, aji ozü sarasadem.

Temeim Chirurtem aser Kinungertem.

Somali yimtiba nung bomb ka pokdaksü; nisung 9 asü

Mogadishu, Chiteni/July 15 (Agencies): Somalia yimtiba Mogadishu nung café ka kima gari nung bomb inoker pokdaksüba sülen nisung teku asü aser nisung aika yiruogo. Nüburtem Euro 2024 football asayamung final repranga aliba mapang iba bomb pokdakja liasü.

Al-Qaeda den sendaktepa aliba al-Shabab teloki Deobarnü bomb pokdaksüba parnok sendaktepa aliba radio ka ajanga nangzuka liasü aser ashiba agi, parnoki security aser sorkar tenzükertem aonung ajurutepa kazüba tesem ka dak rangloker iba bomb pokdakja liasü.

National security agency nungi ketdangsür Mohamed Yusuf-i, AFP news agency dang Hombarnü ashiba agi, iba lendong nung nisung teku süogo, koba ketdangsürtemi Deobar aonung nisung teku asü ta shir liasü.

"Bomb apokba lendong nung civilian teku asü aser tanga nisung 20 yirua liasü," ta pai ashi.

"Restaurant telung nung nisung aika liasü aser parnok timba lanurtem liasü, shirnok football asaya ka repranga liasü. Saka parnok timba apu amshia tesülen atsü pongdang jenteta liasü," ta Yusuf-i ashi.

Online nung lemsatepba noksatem ajanga Deobarnü yimti teyong nung aliba iba nüngtugu café poksatsüba mapang anüngeleni milong aser mokozü pokteta tuguba nguogo.

Bomb apoba sülen police ketdangsür Mohamed Salad, shiba minute ishika lir iba tesemi oa liasü, pai AFP dang ashiba agi, ki raksara aliba nung janatem agi tasümang aika nembanger liasü.

Iba bomb yagi gari ter raksatsü aser iba tesem anasa aliba ki aika raksaja liasü.

Sorkari sepaitem aser parnok den sendaktepa alirtemi tesem aika atsüngyonga oaka al-Shabab puri mapangshia sorkar tenzükertem dak rangloker tesem balala maka arudar.

Mogadishu nung amendaker

aliba sorkar atsüngtoktsü atema Al-Shabab pur küm 17 dak tema rara arudar, aser parnoki linük yimtiba aser linük kübok tesem balala nung aiben bomb pokdakja arudar.

Somalia indang federal sorark ya tashi mesamatsü atema bendanger sepaitem dak metaloker arudar.

African Union sepaitem aser US teyari agia sorkar aser local telungpurtem longjemer iba telok den rara arudar.

Ajisüaka parnok tetsükdaksü aika ajangshia arudar aser taküm küm tetenzüklen al-Shabab puri linük teyongtsü nung tesem aika atsüngba sangdongogo.

Somalia-i taoba ita African Union dang parnok sepaitem meyilongi dang anintsü atema temepeshiba ka agütsüogo.

UN bangzüng ka ajanga AU peacekeeping mission nung sepaitem December 31 tashi nung ajak anintsü aser security ya Somalia army aser police nem meypa agütsütsü ayongzükogo.

Office of the Watsü Mungdang
 HQ: Mokokchung, Nagaland

KONANG TETUSHI AGÜTSÜR

33% women reservation dena agiba ULB election nung Watsü Mungdang Sanen Luden nung züngsem Wt. IMTIMENLA AO, Sungkomen ward nungi takok anguba atema Watsü Mungdangi kanga pelaba lemsateper.

Ano Aotsür kwi kati ULB atema tetoktepa nung takok tulu nguogo, Watsü Mungdang ajanga nenok ajak den pelaba lemsateper aser konang tetushi agütsür.

Tsüngremi nenok wadang nung takok tulu ngua bener aotsü aser nenok taküm tali wazüka yujang ta Watsü Mungdang sarasadem.

Sd/- S. Arenla Longkumer Tir Watsü Mungdang	Sd/- Sungtiriben Tongti Zulur Watsü Mungdang
--	---

Tia mesüra Tsüngremi ni kumzük: Trump



Butler, Chiteni/July 15 (Agencies): Pennsylvania nung rally ka nung Honibar aonung tepsettsü merangba sülen taoba US tir Donald Trump-i pa sür lila ta ashi.

Iba lendong ataloker osangbener den mezüngbuba sensaksemba mapang pai pa ya tia mesüra Tsüngremi kumzük amai bilemer, ta ashi.

"Tesüngmangtsü kaji kü kolak mapang shidak nung meyipshiba ya lir," ta pai ashi aser pa tenarong khapokba injang yagi pa mela-mela khasetla ta ashi.

"Ni sür lila, ni yangi malitsü liasü," ta pai ashi.

Iba lendong nung terepranger ka asü aser ana kanga sashia yiru. Pa dak akhasang ya Thomas Matthew Crooks ta jangjaogo aser pa kasa mapang khaset.

"Küdak injang khaloktsüra nüburtem yangji nokdaka liasü. Idangni ni bilemba rasa meshitet, saka alimai küdak repranga liasü," ta Trump-i ashi.

"Puti otsüi iba indang obendangtsü, aser parnok dang

asenok junga lir ta metetdaksütsüla," ta pai ashi.

Milwaukee, Wisconsin nung Republican National Convention nung adeni tayimtsü ka nung aotsü renemba mapang, linük ka kuma lungjemtsü tang maongka ka lir, ta Trump-i ashi. Milwaukee nungya pa Republican telok nungi tir candidate jangjatsü imlar.

"Honibar lendong ta matalok asübo ni jangratema jembitsü liasü. Saka tangbo khenyongi balaka jembitsüsa akumer. Linük ka kuma lungjemtsü maongka lir," ta pai ashi.

Trump-i pa indang social media sapang Truth Social nung Wisconsin yagi pa ananü menur aotsü tebilemba lir ta shia liasü.

Ajisüaka pai mezüng yangluba sentong nung anidaksü ta ashi.

Arishi küm 20 tain Crooks yagi kechi tebilemba nung Trump dak akhar mejangjateter. FBI ajanga iba tatalokba bushisüngdangba mapang Crooks ya pa kisüngi inyak ta ashi.

Pakistan sorkari Imran Khan'er PTI party shibangtsütsü

Islamabad, Chiteni/July 15 (Agencies): Tang tesüsa Pakistan Tehreek-e-Insaf (PTI) party ajemreptsütsü merangba nung shilem ka ama Pakistan indang federal sorkari iba party shibangtsütsü telemtetba agiogo ta Hombarnü sandong aser iba party tenteter Imran Khan, taoba tir Dr Arif Alvi aser taoba National Assembly deputy speaker Qasim Suri nung anema Article 6 benoktsü meranger.

Iba mera ya tepuokdak yua alisang taoba ato kilonser Imran Khan'er party ya National Assembly nung single largest party akumtsü aliba nokdangtsü meranger amai ajiteter.

Menden wazüka yutsüba aser Iddat ken o nung Pakistan indang Supreme Court ajanga anisüngzük tera agütsü aliba mapang iba osang ya sangdonger alitsü.

Iba tenokdangba agütsüba ya ajanga linük nung tematiba court-i menden wazüka yutsüba aser PTI den sendaktepa aliba ozüng yanglurtem asoshi telemtetba agia aliba yagi koma kongshitsü ano mejangja.

Islamabad nung osangbener den jembidang, asen linük tejakleni oti süra PTI dener meinyaktettsü, ta Information Minister Atta Tarar-i ashi.

"Bendangeri senotsü teyari agütsüba, May 9 mepetmesü

aser cipher aser ano US nung pangzüng agizükba ajanga PTI nokdangtsü kuli tejangja lir ta onoki amanger," ta pai ashi.

"Onoki PTI nokdangtsü aser Constitution indang Article 17 ajanga political party tem nokdangtsü asoshi sorkar nem tashi agütsür ta amanger, aser iba ken o Supreme Court dangi abentsü."

Constitution indang Article 17 (2) nungya, Paistan tenzükba nung maliba senso ajaki political party ka kumtetsü mesüra züngsem akumtsü temeden lir, ajisüaka Pakistan indang sovereignty aser integrity den apet tenokdangba agütsütsü, ta shia lir.

(Maneni tapak 8 nung...)

Spain-i goal 2-1 agi England koka Euro 2024 kokogo



Chiteni/July 15, 2024 (Agencies): Deobarnü Berlin nung Euro 2024 final nung Spain-i goal 2-1 agi England koka, küm 60 tsüingda tang mezüingbuba asayamung tongtibang ka akoktsü atema England timla aliba tembangdaksüogo.

Asaya nung Spain nung midfielder Rodri yiruba ajanga asaya tanabuba shilem nung masayatetsüsa aküm aser iba ajanga team tetsükdaksü adok, ajisüaka asaya tanabuba shilem tenzüker minute anabuba nung Lamine Yamal-i ball tajung ka agütsüba Nico Williams-i idakja parnok tejkadang aküm.

Ajisüaka taküm asayamung nung asaya timbaka nung ama England team-i meyipa arur minute 73buba nung substitute Cole Palmer-i goal ka idakja goal kasasa aküm.

Team ana kanga toktepa asaya arur mapang apuloktsür asayatsü ama bilema aliba mapang minute 86buba nung

Real Sociedad forward Oyarzabal-i par team atema tanabuba goal idakja parnoki European Championship pezübenbuba kokogo.

Taoba mapang Spain-i iba asayamung ya 1964, 2008 aser 2012 küm koker liasü. Xavi Hernandez, Xabi Alonso aser Andres Iniesta nung amala nüngtugu asayartem asaya aliba mapang 2010 küm World Cup akokba sülen parnoki tesüsa 2012 küm Euro asayamung koker liasü.

Asayamung tepeyong Spain team-i tajungba asaya aruogo aser final nunga parnoki tajungba asaya aser asaya reprangertem timba England team pusemertem süaka iba ajanga parnok nem kecha tetsükdaksü magütsü.

England team-i 1966 küm World Cup akokba sülen tang tashi nung asayamung tongtibang ka danga koka mali aser taküma parnok final nung

tamakok nguogo. Küm asem tejkadang Euro final nung Italy makokba sülen parnok Euro asayamung ana atonga final nung tamakok anguba mezüingbuba team kümogo.

Kasa mapang nung Lamine Yamal (Spain) nem UEFA Euro 2024 Young Player of the Tournament naroküm agütsü. Pai goal ka idaktsü aser assist 4 süja liasü. Arishi küm 17 tain asayar ya Euro asayamung nung goal idaktsüba asayar tanobusang kümogo.

Spain nungisa Rodri nem UEFA Euro 2024 Player of the Tournament agütsü aser UEFA Euro 2024 Golden Boot award angurtem rongnung Dani Olmo-a densema liasü.

Taküm Golden Boot award ya Cody Gakpo (Netherlands), Harry Kane (England), Jamal Musiala (Germany), Ivan Schranz (Slovakia) aser Georges Mikautadze (Georgia) nungeri ngua liasü.

Thomas Muller international football asaya nungi anener



Chiteni/July 15, 2024 (Agencies): Germany team aser Bayern Munich nungi midfielder Thomas Muller-i Hombarnü pa international football asaya nungi anenba sangdongogo.

Nüngtugu midfield asayar ya EURO 2024 asayamung nung Germany tsükba sülen tang asaya nung anener. Pa linük tenüng nungi küm 14 asayaba mapang asaya 131 nung asayaogo aser pa takok tajung anguba asayartem rongnung ka lir.

“Ni linük tenüng nungi kanga nema danga asayaogo. Onoki takok aser tamakok ajak ajangshiaogo,” ta pa YouTube nung video ka ajanga ashi.

“Küm 14 tejkadang ni international jenjang nung mezüing asayaba mapang ni papika ya asayatsü aser takok paika ya angutsü ta bilema maliasü. Ni fan tem aser Germany teammate tem ajak dang kümtem tsüingda ni nongita yariba atema kanga pelaba lemsateper,” ta pai ashi.

Müller Germany national

team nungi mezüingbuba 2010 küm March ita Argentina goal 1-0 agi makokba asaya nung shilem agia liasü. Pa DFB team nungi World Cup pezü aser European Championships pezü nung asayaogo.

Germany team nungi 131 ben asayaba sülen Müller ya DFB puti otsü nung Lothar Matthäus (150) aser Miroslav Klose sülen linük tenüng nungi timbaben asayaba asayar lir. Maneni pai international goal 45 idaktsüba sülen pa ya Germany nung asayartem rongnung goal timtiba indaktsüba asayartem rongnung tenetbuba ama asaya nungi anener.

Taoba mapang Bayern Munich nung aser Germany teammate Toni Kroos asaya nungi anenba sülen Müllera asaya nungi anentsü telemtetba agiba sangdongogo.

Taküm European Championships nung Germany team quarter-final nung Spain-i goal 2-1 agi tsükdakja liasü, shirkok asayamung kokogo.

Argentina-i otsüsütsüsa Copa America 16benbuba kokogo



Chiteni/July 15, 2024 (Agencies): Deobarnü Hard Rock Stadium nung Argentina aser Colombia na Copa America final asaya nung mapang apuloktsür asayaba mapang Lautaro Martinez-i goal ka idakja Argentina-i otsüsütsüsa iba asayamung 16benbuba kokogo.

Asaya metenzük tsüingda security nung tetsükdaksü adokba aser asaya reprangertem tsüingda mangatettep adokba sülen iba asaya minute 82 agi menor tenzüka liasü.

Taküm iba asayamung densema Argentina-i asayamung tongtibang asem atonga kokogo. Parnoki 2021 Copa akok aser iba sülen 2022 küm Qatar nung World Cup koka liasü.

Argentina asoshi tia maka asaya nung minute 66buba nung captain Lionel Messi yirur tuguatok aser iba ajanga asaya nung tapok adoka liasü, saka asaya tatemtsü lia Martinez-i goal ka idaktsüba ajanga parnoki asaya kokogo. Iba

asaya ya Angel Di Maria atema-a national team nung tatembangbuba asaya liasü.

Colombia, shirnoki tesüsa 2001 küm Copa America koker lir parnok atema Deobar aonung ya tezüdangtsü aonung ka liasü, kechiyong parnoki asayanüba ama masayateti liasü.

Asaya tetenzüklen minute tenetbuba nung Colombia nung asayar Jhon Corboba-i metsüba ball ka post nung ondaker adokba dak alak telok anapronglai goal idaktsütsü asoshi maongka tajung monguteti liasü.

Kasa mapang nung taküm Copa America asayamung nung Argentina nung asayar Lautaro Martinez-i Golden Boot award angu. Pai asayamung tepeyong nung goal 5 idakja liasü.

Maneni Best Player award James Rodriguez (Colombia) nem agütsü, Golden Glove award (best goalkeeper): Emiliano Martinez (Argentina) nem agütsü aser Fair Play Award Colombia team nem agüja liasü.

BENDANGLI OSANG : Tapak 7 nungi...

Pakistan sorkari Imran Khan'er PTI party...

Pakistan indang sovereignty mesüra integrity den mapetba yimya nung tentetba aser inyaksangshiba political party ta Federal Government-i sangdongba ya sangdonger anogo 15 tsüingta Federal Government-i Supreme Court dangi abentsü aser yangji telemtetba tatem agütsü, ta shia lir.

“Ner yimten tejangraba mechi linük indang diplomatic tesendaktep raksatsütsü merang aser Pakistan anema US nung pangzüng ka agizük,” ta pai ashi.

PTI tali alenbanga ayutsü mechi sorkari taoba tir ArifAlvi, Imran Khan aser National Assembly indang taoba deputy speaker Qasim Suri nung anema sorkari Constitution indang Article 6 kübok ken o ka benoktsü telemtetba agiogo, ta Tarar-i ashi. Article 6 nungya April 2022 nung Khan anema parliament nung no-confidence motion benokaka assembly shibangba atema linük ashioktsür ama akumba sayur.

“Sorkari taoba tir ArifAlvin, Imran Niazi aser taoba deputy speaker Qasim Suri anema Constitution indang Article 6 benoktsü telemtetba agiogo,” ta pai ashi.

PTI yagi tetsür aser minorities atema menden wazüka yutsütsü temsüa lir, ta taoba hopta Supreme Court of Pakistan-i obendang agütsüba reprangshitsü atema sorkari petition ka agütsütsü, ta Information Minister-i ashi.

Peshawar High Court aser Election Commission of Pakistan ajanga tetsür aser Muslim nung masür nem menden wazüka meyutsütsü Sunni Ittehad Council nem obendang agüja aliba sülen Supreme Court ajanga PTI bhukuma obendang agüja liasü.

PTI indang election symbol agientsüba sülen iba party-i yariba candidate temi February 8 elections nung independents candidate ama toktepa takok ngua liasü aser coalition ka kumtetsü atema SIC den aden.

BILEMDANGANG
“Nai memerangdangra memetetsü.”